

Script of Evening Gojri News Bulletin 30 December 2024 at 1700 Hrs

ایوننگ گو جری نیوز بلیٹن مور 30 دسمبر 2024

یوہ آکا شوانی جموں بے عبدالرحمان شاہین تے محمد اکرم چودھری تیں خبر سُنو۔
پہلاں خاص خاص خبر۔

*1۔ بھارتی خلائی تحقیق تنظیم اسرو اج رات سری بری کوٹہ توں دو سیٹلائٹ لانچ کرے گو۔ تاکہ خلائی جہاز غا ڈاکینگ تے آن ڈاکینگ غو مظاہرہ کیو جا سکے۔

*2۔ بھارت 2025 مانہ پہلو عامی آڈیو ویزول انٹرٹین منٹ اجلاس غی میزبانی کرے گو۔

*3۔ اسکولی تعلیم بارے محکمہ نے اہل اُمید واراں توں جے کے بوس چیرمین تے جے کے سی ای آر ٹی غا ڈائریکٹر غے طور تعیناتی واسطے درخواست طلب کر رہیو ہے۔

*4۔ محکمہ موسمیات غی طرفوں پیشنگوئی کی گئی ہے جے جموں غا میدانی علاقہ 3 جنوری تیں 6 جنوری تک ہلکی تیں درمیانہ درجہ غی بارش ہو سکے، تے 4 اور 5 جنوری نانہ کچھ مقامات ور برف پے سکے۔

*5۔ تے بارڈر گوا سکر ٹرافی گا چوتھا ٹیسٹ مقابلہ مانہ اسٹریلیا نے بھارت نانہ 1 سو 84 دوڑاں نال شکست دے دتی ہے۔

خبراں غی تفصیل نال پہلاں عبدالرحمن شاہین۔

ISRO SPADEX

بھارتی خلائی تحقیق تنظیم اسرو سپیڈیکس مہم غا طور خلائی ڈاکینگ تجربہ غے نال سیٹلائٹاں نانہ خلاء مانہ چھوڑن واسطے پوری طرح تیار ہے، تے اج رات 2 سیٹ لائیو نیٹاں ”ایس ڈی ایکس 01“ تے ”ایس ڈی ایکس 02“ نانہ آندھرا پردیش غا سری بری کوٹہ توں خلاء مانہ چھوڑے گو۔ ان 2 سیٹ لائیو نیٹاں نانہ 4 سو 70 کلو میٹر غا گول مدار مانہ رکھیو جائے گو۔ جہیزو تقریباً 66 دن غا مقامی وقت غا چکر غے نال 55 ڈگری غا جھکاؤ ورے گو۔ دوہاں سیٹلائٹاں نانہ 10 تے 20 کلو میٹر غا فاصلہ ور اک ہی مدار مانہ رکھیو جائے گو، سپیڈیکس خلائی ڈاکینگ غو تجربہ اک بار کا میاب ہون غے بعد بھارت نانہ اک ایسا ملک غے طور قائم کرے گو۔ جہیزو انسانی خلائی پرواز اور سیٹ لائیو، سروسینگ مہم نانہ کامیابی نال انجام دے سکے گو۔ واضع رہ جے صرف امریکہ، روس تے چین نے خلائی ڈاکینگ تحقیق مانہ بھارت حاصل کی ہے۔

Waves Summit

وزیر اعظم نریندر مودی نے کہیو ہے کہ پہلی بار عالمی آڈیو ویزول انٹرٹین منٹ اجلاس ”ویوز سمٹ“ اگلا سال بھارت مانہ منعقد کیو جائے گو۔ یاہ گل گذشتہ روز اُن نے اپنا من کی بات پروگرام غے دوران کہی تھی۔ اُنہاں نے کہیو جے ویوز اجلاس غے دوران میڈیا تے تفریحی صنعت تے تعلق رکھن آلا بڑا تے تخلیقی دنیا غا لوک بھارت آویں گا۔ اُنہاں نے کہیو جے یاہ چوٹی کا نفرنس بھارت مانہ عالمی مواد غی تخلیق غو مرکز بنان آلیے پاسے اک قدم ہے۔ اُنہاں نے اس گل ور خوشی غو اظہار کیو جے ملک غا

نوجوان اس اجلاس واسطے تیاریاں مانہ پورا جوش وجذبہ نال شامل ہو رہیا ہیں۔ انہاں نے کہیو جے بھارت 5 ٹریلین ڈالر غی معیشت آلے پاسے بدھ رہیو ہے۔

Nirmala Pre Budget Meeting

خزانہ تے کارپوریٹ معاملات غی مرکزی وزیر نرملا سیٹھا رمن نے اج نوی دہلی مانہ آتا مرکزی بجٹ 26/2025 غے پیش نظر صنعتی نمائنداں سنگ 5 ویں بجٹ تیں پہلاں غی مشاورتی میٹنگ غی صدارت کی۔ اس میٹنگ مانہ کئی محکماں غا سیکریٹریاں نے شرکت کی۔ جن مانہ مالیات، سرمایہ کاری و عوامی اثاثہ جات غا انتظام، اقتصادی امور تے صنعت و داخلی تجارت غا فروغ پارے محکمہ ہیں تے حکومت ہند غا اعلیٰ اقتصادی صلاحکار وی اس میٹنگ مانہ شامل تھا۔ مالی سال 26/2025 واسطے متوقع ہے جے مرکزی بجٹ یکم فروری 2025 نانہ پارلیمنٹ مانہ پیش کیو جائے گو۔ وزیر خزانہ نرملا سیٹھا رمن غی طرفوں یوہ لگاتار اٹھوون بجٹ پیش کیو جائے گو۔

Army LOC Vigilance

بھارتیہ فوج غی طرفوں کنٹرول لائنیں ور پونچھ غا اوجا مقامات ور اپنی چوکسی نانہ مزید سخت کر دتو ہے۔ جت پہاڑی برفباری غے دوران جدید ٹیکنالوجی تے تخلیقی حکمت عملیاں غو استعمال کیو جا رہیو ہے، تانجے حفاظت نانہ یقینی بنایو جا سکے۔ برفباری غے باعث نظر آن غی مشکلات سنگ نمڑن پارے فوج نے جدید ترین نگرانی غا نظاماں غو استعمال کیو ہے، جن مانہ تھرمل امیجنگ آلات، نانٹ ویژن کیمرہ، بغیر پائلٹ غے چلن آلی یو اے ویز تے خصوصی اونچائی آلا سامان شامل ہیں۔ جس طرح کہ گرم کپڑہ برف ور چلن آلا جوتا، جدید مواصلاتی آلات وغیرہ۔ مزید اُت گرم پناہ گاہ تے بنکرز فراہم کیا گیا ہیں، تانجے اہلکار سخت سردی مانہ آرام حاصل کر سکیں۔ برف سنگ ٹکی وی زمین ور نقل و حرکت نانہ ممکن بنان واسطے فوج نے ہر جگہ چلن آلیں گڈیں، برفانی سکوترز تے خصوصی طور ور تربیت یافتہ سنفر کتاں نانہ متعارف کرایو ہے۔ واضع رہے جے یہ وسائل انتہائی دشوار گزار علاقیاں مانہ وی گشت کرن مانہ مدد دیں۔ یہ ٹیکنالوجی کنٹرول لائنیں غے پارکسے وی مشکوک سرگرمی غی 24 گھنٹاں نگرانی نانہ ممکن بناویں۔

Somvati Amavasya

اج سوموار غے ورز سومواتی مسیہ ہے، جہیڑی کہ خصوصی رسومات تے پوجا پارے مشہور ہے، اس سلسلہ مانہ اج پورا جموں مانہ عقیدت منداں غی مندران مانہ بھیڑ دیکھی گئی۔ بڑا مندران جس طرح کہ تاریخی رگوں ناتھ مندر تے باوے والی ماتا مندر مانہ حاضری واسطے عقیدت منداں غی لمبی قطار ریکھی گئیں۔ یہ لوک اُت خوشحالی تے بہتری پارے رسومات ادا کر رہیا تھا۔ بہت سارا لوکاں نے برت رکھیا تے فلاحی و خیراتی کاروائیاں مانہ شریک ہوا۔ یوہ منتاں واں جے اس سنگ پروردگار خوش وے اور کرم کرے۔ سومواتی مسیہ اُس دن وے جد سوموار نانہ نوون چن لے، تے یون دن بندو روانیت مانہ کا فی اہمیت رکھے۔ مندران مانہ حاضری دین تیں علاوہ عقیدت مند دریا واں جس طرح کی توی تے چناب مانہ شان کرتا واہ دیکھیا گیا۔ جس نانہ اس دن پوتر منیو جائے۔ اس پارے دستاں واں اک پنڈت نے مزید کجھ اس طرح کہیو۔ بانٹ۔۔

SSP Udhampur

اُدھم پور پولیس نے نشہ مُکت مہم غو آغاز کر غے اس دوران نشہ تسکراں غو پردو لگاتار فاش کر رہی ہے۔ مہارا آکاشوانی نمائندہ نال گل کرتاں واں ایس ایس پی اُدھم پور امود اشوک ناگیو ری نے تفصیلی جانکاری دیتاں واں کہیو جے نشہ غا کاروباریاں غے خلاف کاروائی کرتاں واں سال 2024 مانہہ این ڈی پی ایس ایکٹ غے تحت 77 معاملہ درج کیا گیا ہیں تے 1 سو نشہ غا کاروباریاں نانہہ حراست مانہہ لیو ہے تے اس بارے مہم اجوں جاری رہ گی۔ مزید جانکاری دیتاں واں اُنہاں نے کہیو جے اس مہم غے تحت نشہ غا گُجھ بڑا کاروباریاں غی جائیداداں نانہہ وی ضبط کیو گیو ہے۔ اس بارے گل کرتاں واں اُنہاں نے اس طرح کہیو۔ بانٹ۔۔۔

مزید خبراں نال محمد اکرم چودھری۔ ور اُس تیں پہلاں یوہ پیغام۔(یہ خبر تم آکاشوانی جموں تیں سن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ور وی دستیاب ہیں، اس تیں یہ خبر مہاری موبائل ایپ تے ڈی ٹی ایچ ور وی دستیاب ہیں)

SED

اسکولی تعلیم محکمہ نے اج جموں کشمیر اسکولی تعلیم بارے بورڈ جے کے بوس تے ڈائریکٹر جے کے ایس سی ای آر ٹی گا چیرمین غی تقرری واسطے اہل امید واراں توں درخواست طلب کی ہیں۔ واضع رہ جے جموں کشمیر سرکار نے دو سال گا وقفہ واسطے حالیہ جے کے بوس غا چیرمین ڈاکٹر پرکشت سنگھ منہاس نانہہ تعینات کیو تھو۔ جن غی مدت 25 جنوری 2025 نانہہ ختم ہو رہی ہے۔ جموں کشمیر تعلیمی بورڈ مانہہ بطور چیرمین عہدو سنبھالناں توں پہلاں ڈاکٹر منہاس جموں یونیورسٹی مانہہ مہمان نوازی تے سیاحت انتظام بارے اسکول غا ڈائریکٹر غے طور ور کم سر انجام دے رہیا تھا۔

IIA Jammu

انڈین انسٹی ٹیوٹ آف آرکیٹیکس یعنی آئی آئی اے جموں کشمیر چیپٹر نے اک بار فر تعمیراتی مواد بارے نمائش بی ایم سی 25 غے سنگ قدم بدھایو ہے جہیڑی کہ اپنی نوعیت غی 11 مسلسل کاوش ہے۔ اس غو مقصد جدید تعمیراتی مواد تے تکنیکاں غے ذریعے تعمیراتی صنعتانہ تبدیل کرنو ہے۔ جنہاں نانہہ مُلک پہر تیں جمع کیو گیو ہے۔ یاہ نمائش جے کے ریزارٹ ماربل مارکیٹ جموں مانہہ 3 جنوری تیں 6 جنوری 2025 تک منعقد وے گی۔ جت تقریباً 70 سٹالز وینگا۔ جہیڑہ اک چھت غے تلے مصنوعات غی وسیع اقسام نانہہ پیش کریںگا۔ اس نمائش مانہہ داخلو سب واسطے مفت وے گو۔ آئی آئی اے جموں کشمیر چیپٹر مرکزی زیر انتظام علاقہ مانہہ معمار پیشہ نانہہ فروغ دین مانہہ اہم کردار ادا کر رہیو ہے تے آرکیٹیکٹس تے تعمیراتی صفت سنگ وابستہ کاروباری اداراں نانہہ اک ہی پلیٹ فارم ور اکھٹاں کرے۔

Cricket

کرکٹ مانہہ بارڈر گو اسکر ٹرافی غا چوتھا ٹیسٹ مقابلہ غے آخری تہاڑے اج استریلیا نے بھارت نانہہ 184 دوڑاں نال ہرا دتو ہے۔ اس شکست نال بھارت غاورلڈ ٹیسٹ چمپئن شپ غا فائنل مانہہ پُجن غی امید وی کہٹ ہو گئی ہیں۔ 3 سو 40 دوڑاں غو پچھو کرتاں واں

بھارت غی پوری ٹیم دوجی پاری مانہ 1 سو 55 دوڑاں ور آوٹ ہو گئی۔ بھارت غی طرفوں جسسوی جیسوال نے سب تیں متی 84 دوڑ بنائیں۔ جد کہ اسٹریلیا غی طرفوں پیٹ کمنز نے سکاٹ ہو لینڈ نے 3/3 وکٹ تے نتھن لائین نے 2 وکٹ حاصل کی۔ پیٹ کمنز نانہ میچ غو بہترین کھلاڑی قرار دتو گیو۔

Weather

محکمہ موسمیات غو کہنو ہے جے وادی کشمیر جت سردی غی لہر شدید چل رہی ہے، تے اُت پورا خطہ مانہ درجہ حرارت سطح منجمد تیں تلے چل رہیو ہے۔ اُت متوقع طو ر آن آلا دناں مانہ برفباری غا دو دور ہو سکیں۔ وادی مانہ حال ہی مانہ اس موسم غی پہلی بڑی برفباری غو مشاہدو کیو گیو ہے۔ محکمہ موسمیات غی طرفوں آج تیں پلک بارے موسم خشک رہن غی پیشنگوئی کی گئی ہے۔ مگر دسیو گیو ہے جے ان دناں مانہ کُجھ مقامات ور ٹھنڈ تیز رہ گی۔ نواں سال غی پہلی رات نانہ موسم آبر آلود رہن تے کُجھ مقامات ور ہلکی برفباری غی پیشنگوئی کی گئی ہے۔ اسے طرح 3 تیں 6 جنوری تک موسم آبر آلود رہن، جموں غا میدانی علاقان مانہ ہلکی تیں درمیانہ درجہ غی بارش ہون تے جموں کشمیر غی کئی ساری جگہاں ور برفباری غی پیشنگوئی کی گئی ہے، تے موسم غی یاہ شدت 4 اور 5 جنوری نانہ رہ سکے، کیونجے محکمہ موسمیات غی طرفوں کہیو گیو ہے جے ان تاریخان نانہ کُجھ اک مقامات ور پہاری برفباری غا امکان ہیں۔ سیلانیاں، سفر کرن آلاں تے ٹرانسپورٹراں نانہ مشورو دتو گیو ہے جے وے او چا علاقان تے میدانی سڑکاں ور کورہ غا پھسلن، کُجھ مقامات ور منجمد پوانٹ آلا درجہ حرارت تے برفباری غا تناظر مانہ ضلع انتظامیہ تے ٹریفک محکمہ غی ہدایات غے مطابق سفر شروع کریں۔ واضع رہ جے جموں سرینگر قومی شاہراہ ور دواں طرفوں ٹریفک پلا رکا وٹ چل رہی ہے۔

اس غے نال ہی خبراں غو یوہ بلیٹن ختم ہوؤ۔